

詩  
經  
類  
考

許經類考卷之二十

明武塘沈萬鈞仲容采輯

成周賦役考

陳潛室木鍾集曰鄉遂之法溝洫以授田貢以制賦  
比伍以調兵攷之遂人云夫間有遂遂上有徑至萬  
夫有川川上有路此溝洫法也而以什一貢法制賦  
至調兵之法攷之小司徒云五人爲伍至五師爲軍  
又云凡起徒役毋過家一人則是一家出一夫一鄉  
出一軍此比伍法也都鄙之法井田以授田助以制  
賦丘乘以調兵攷之小司徒云九夫爲井至四縣爲

都此井田法也而以九一助法制邦賦至調兵之法  
攷之司馬法云甸方八里實六十四井出兵車一乘  
甲士三人步卒七十一人馬四匹牛十二頭此丘乘  
法也溝洫長連畫去井地方方積去溝洫以十起數  
井田以九起數丘乘以田數起兵比伍以家數起兵  
大約丘乘法是七家出一人比伍法是一家出一人  
都鄙兵用征戍故用民少鄉遂兵止衛王畿不調發  
故用民多要之鄉遂雖重而實輕都鄙雖輕而實重  
○太平經國書說謂鄉遂之地但出兵都鄙之地則  
出車與牛馬○杜氏通典云周文王在岐用平土之

法以爲治人之道地著爲本故建司馬法六尺爲步  
步百爲畝畝百爲夫夫三爲屋屋三爲井井十爲通  
通十爲成成十爲終終十爲同同方百里同十爲封  
封十爲畿畿方千里故丘有戎馬一疋牛三頭甸有  
戎馬四疋兵車一乘牛十二頭甲士三人步卒七十  
二人一同百里提封萬井戎馬四百疋車百乘此卿  
大夫采地之大者是謂百乘之家一封三百六十六  
里提封十萬井定出賦六萬四千井戎馬四千疋車  
千乘此諸侯之大者謂之千乘之國天子之畿內方  
千里提封百萬井定出賦六十四萬井戎馬四萬疋

言系類  
兵車萬乘戎卒七十二萬人故曰萬乘之主○車徒  
○周禮夏官九制軍萬有二千五百人爲軍王六軍  
大國三軍次國二軍小國一軍軍將皆命卿二千有  
五百人爲師師帥皆中大夫五百人爲旅旅帥皆下  
大夫百人爲卒卒長皆上士二十五人爲兩兩司馬  
皆中士五人爲伍伍皆有長一軍則二府六史胥十  
人徒百人王之命卿卽六卿侯國軍將之卿卽天子  
所命之卿也蓋王朝之官有六卿二十七大夫八十  
一元士在六卿則爲卿大夫州長黨正族師而屬於  
大司徒在六軍則爲軍將師帥旅帥卒長而屬於大

司馬此皆兼領之職如一旅帥兼領二三旅一卒長兼領二三卒之類蓋王朝之官軍中指揮者故得兼領之若夫中下士在鄉爲閭胥比長在軍爲兩司馬伍長皆民間勇士親蒞行伍者故得專領之也○國中鄉遂之地五家爲比五比爲閭凡二十五家四閭爲族凡百家出車一乘野外都鄙之地八家同井四井爲邑三十二家也四邑爲丘一百二十八家也四丘爲甸五百十二家也出車一乘車一乘則甲士三人居左者爲正主射居右者爲副主刺居中者爲僕主御步卒七十二人左角二十四人左甲士領之右

角二十四人右甲士領之前拒二十四人中甲士領之又二十五人將重車在後總百人也國中以五起數故一族出車一乘一黨出車五乘一州出車二十五乘野外以四起數故一甸出車一乘一縣出車四乘一都出車十六乘合五與四而後世九軍陳法生焉蓋九軍陳法五爲正四爲奇古卿大夫士其正治在鄉遂其食邑在都鄙有事出征其將士皆卿大夫爲之故正兵受之於君鄉遂之軍也奇兵將所自出都鄙之軍也○薛氏曰天子六鄉六遂合有十二軍而止云六軍何也蓋六鄉爲正軍六遂爲副倅至于

大國之三鄉三遂次國之二鄉二遂小國之一鄉一遂莫不然春秋襄十一年作三軍春秋書作以譏之蓋魯爲侯次國也不宜復作三軍至昭五年舍中軍公羊則曰舍中軍復古也其後晉作三行以增上中下而當六軍則世衰禮壞諸侯僭天子矣以上出王制考○葉時禮經會元曰成周役民之法有四比閭族黨是鄉之役在民府史胥徒是官之役在民伍兩卒旅是兵之役在民蒐苗獮狩是田之役在民在鄉之役也常在官之役也久在田之役也簡在兵之役也疎在鄉在官猶祿之以田在田在兵則民皆自給之矣其



他大事致民則追捕之役也大故致民則守衛之役也城郭溝渠途巷之役則治之牛馬委輸車輦之役則共之其爲役若繁矣然小司徒之均土地上地家五人中地家三人下地家二人是均之以土地之美惡也卿大夫之登夫家國中自七尺以及六十野自六尺以及六十有五征之以國野之遠近也均人之均力政豐年則旬用三日中年二日無年一日是又均以年歲之上下也況卿大夫辨其役之可舍者貴者賢者能者服公事者老者疾者皆舍則又有其等矣是以民不惟不以役爲勞且將以役爲樂也○

陳祥道云小宰以官府之八成經邦治一曰聽政役以比居大司徒大軍旅大田役以旗致萬民而治其徒庶之政令小司徒上地家七人可任也者家三人中地家六人可任也者家五人下地家五人可任也者家二人凡起徒役無過家一人以其餘爲羨唯田與追胥竭作凡國之大事致民大故致餘子大軍旅帥其衆庶小軍旅巡役治其政令大喪帥邦役治其政教鄉師大役則帥民徒而致治其政令旣役則受州里之役要以考司空之辟以逆其役事鄉大夫之職以歲時登其夫家之衆寡辨其可任者國中自七

尺以及六十野自六尺以及六十有五皆征之其舍者國中貴者賢者能者服公事者老者疾者皆舍以歲時入其書鄉師大役則帥民徒而至治其政令州長若國作民而師田行役之事則帥而致之掌其戒令與其賞罰黨正凡作民而師田行役則以其法治其政事族師若作民而師田行役則合其卒伍簡其兵器以鼓鐸旗物帥而至掌其治令戒禁刑罰縣師若將有軍旅會同田役之戒則受法于司馬以作其衆庶及馬牛車輦會其車人之卒伍使皆備旗鼓兵器以帥而至遂人若起野役則令各帥其所治之民

而至以遂之大旗致之凡事致野役而師田作野民  
帥而至掌其政治禁令遂師作役事則聽其治訟鄙  
師凡作民則掌其戒令以時數其衆庶察其姦惡而  
誅賞縣正若將用野民師田行役移執事則帥而至  
治其政令稍人若有會同師田行役之事則以縣師  
之法作其同徒輦師而至以治其政令以聽於司馬  
鄼長若作其民而用之則以旗鼓兵革帥而至大司  
馬簡稽鄉民以用邦國凡令賦以地與民制之上地  
食者三之二其民可用者家三人中食地者半其民  
可用者二家五人下地食者三之一其民可用者家

二人大役與慮事屬其植受其要以待考而誅賞均  
人凡均力政以歲上下豐年則公旬用三日焉中年  
則公旬用二日焉無年則公旬用一日焉凶札則無  
力政王制曰用民之力歲不過三日司空興事任力  
凡使民任老者之事食壯者之食五十不從力政六  
十不與服戎八十者一子不從政九十者其家不從  
政廢疾非人不養者一人不從政祭義曰五十不爲  
甸徒論語曰使民如承大祭孟子曰有布縷之征有  
粟米之征有力役之征君子用其一緩其二用其二  
而民有殍用其二而父子離詩大東曰東國困於役

北山曰役使不均古者府史胥徒有常職而民不與焉其所與者軍旅田役而已故任之以地之媿惡辨之以國野之遠近均之以歲之上下小司徒止地家七人可任也者家三人中地家六人可任也者家五人下地家五人可任也者家二人此任之以地也卿大夫國中自七尺以及六十野自六尺以及六十有五皆征之此辨之以國野也均人凡均力政以歲上下豐年則公旬用三日中年則公旬用二日無年則公旬用一日凶札則無力役此均之以歲也上地食七人中地食六人下地食五人而任之者僅半而已

蓋以下養上則不足以上養下則有餘故凡起徒役又無過家一人所謂施從其厚事舉其中與食壯者之食任老者之事同意七尺六尺征之以其才六十六十有五舍之以其齒國中近而役多故晚征而早舍野遠而役少故早征而晚舍欲勞逸輕重均而已與近郊什一遠郊二十而三甸稍縣都無過十二同意力政有征於鄉有征於司徒征於司徒則公用之也故豐年公甸用三日則是歲用二十七日中年公甸用二日則是歲用十有八日無年公甸用一日則是歲止用九日而已以均力政在歲成之後惟有於

冬之一時故也其作之也在鄉則族師以鼓舞鐸旗  
物帥而至大司徒以鄉之大旗致之在遂則鄮長以  
旗鼓兵革帥而至遂人以遂之大旗致之蓋鄉百家  
爲族遂百家爲鄮百家然後致之以旗鼓則下於百  
家者非必旗鼓也司徒之於六鄉遂人之於六遂以  
鄉遂之大旗致之則族師鄮長之旗非大旗也鄉有  
鄉官致之遂有遂官致之至於邦國都鄙甸稍郊里  
之地縣師又備旗鼓兵器致之則所統有其人所會  
有其地所治有其法此所以如臂使指而無不率從  
也其不役者國中貴者賢者能者服公事者老者疾



者皆舍又八十者一子不從政廢疾非人不養者一人不從政父母之喪三年不從政齊衰大功之喪三月不從政將徙於諸侯者三月不從政自諸侯徙家不從政然則役之義也舍之仁也義故民忘其勞仁故民悅其德此所以北山不均之刺不作於下而餘力之頌日聞於上也後世踐更之法雖丞相之子不免戍邊非所謂舍貴者也絳之老人辱在泥塗非所謂舍老者也豈可與議先王之法哉周禮均人無年之力政猶至九日王制用民之力歲不過三日非周禮也鄉大夫國野之役至於六十六十有五王制

曰五十不從力政祭義曰五十不爲甸徒亦非周制也然六十不與服戎恐周亦然班超傳曰古者十五授兵六十還之韓詩說三十授兵六十還兵其授兵早晚雖殊其六十還兵一也

成周賦役考卷二十

終

詩經類考

成周賦役卷二十

詩經類考卷之二十一

明武塘沈萬鈞仲容采輯

刑獄考

白虎通云聖人治天下必有刑法何所以佐德助治也○申子曰君必有明法正義若縣權衡以稱輕重所以一羣臣也釋名曰獄確也言實確人情僞也又謂之牢言所在堅牢也又謂之圜土言築土之表牆其形圜也又謂之囹圄囹領也囹禦也○鄉亭之繫曰犴朝廷曰獄犴胡地犬也急就章皋陶造獄後代因之○漢書述周官斷獄有五聽八議三刺三宥三

赦之法

也刺殺

五聽

一曰辭聽

觀其出言不直則煩

二曰色聽

觀其

顏色不直則變

三曰氣聽

觀其氣息不直則喘

四曰耳聽

觀其聽聆不直則惑

五

曰目聽

觀其瞻視不直則亂

八議

一曰議親

王之親族也

二曰議故

王之故舊也

三曰議賢

有德行者也

四曰議能

有道義者

五曰議功

有大勲力者

六曰議貴

爵位高者也

七曰議勤

盡悴事國者也

八曰議

賓

前代之後自五聽至此皆小司寇所職也三刺一曰訊

羣臣二曰訊羣吏三曰訊萬民三宥一曰弗識

二曰過失

非意也

三曰遺忘

忽忘也

三赦一曰幼弱

七歲以下

二曰老耄

八十以上

三曰蠢愚

生而癡騃者

三刺以下皆司刺

所職也白虎通云三王始有獄博物志云夏曰念室

殷曰動止周曰稽留三代之異名也又狴牢者亦獄  
別名一云夏曰夏臺又曰鈞臺殷曰羑里周曰圜土  
又曰囹圄○白虎通云刑所以五何法五行也又曰  
科條三千者應天地人情也象天道而行刑故書曰  
象刑○說文曰科程也程品也十發爲程十程爲寸  
楊雄劇秦美新論曰懿律嘉量金科玉條謂當金玉  
珍之也○杜氏通典五刑之法墨罪五百劓罪五百  
宮罪五百剕罪五百凡二千五百所謂刑  
平邦用中典者也穆王享國百年旄荒命呂侯度作  
刑訓夏贖刑墨罰之屬千劓罰之屬千剕罰之屬五

百宮罰之屬三百大辟之罰其屬二百五刑之屬三千其後又作九刑○呂氏春秋云皋陶作刑○世本云伯夷作刑○春秋元命苞曰刑者側也說文曰刀守井也飲之人入井陷于川刀守之割其情也岡言爲詈刀守詈爲罰罰之爲言內也陷於害也井飲人則人樂之不已則自陷于川故加刀謂之刑欲人畏懼以全命也罰以刀守之則不動矣今作罰用寸寸丈尺也言納以繩墨之事○尚書呂刑云惟敬五刑以成三德一曰野刑上功糾力二曰軍刑上命糾守三曰鄉刑上德糾孝四曰官刑上能糾職五曰國刑

上愿糾暴鄭注糾謂察異也○叔向曰夏有亂政而作禹刑商有亂政而作湯刑周有亂政而作九刑三辟之興皆叔世也○漢書曰貫索貴人之牢勾圜十五星杓曰賤人之牢牢星實則囚多虛則開出○春秋元命苞曰爲獄圓者象斗運宋均注曰作獄圓者象斗運也○禮記曰仲春之月命有司省圜圜去桎梏正獄訟仲夏門閭無閉關市無索挺重囚益其食挺寬也孟秋之月命有司修法制繕圜具桎梏○周禮以肺石達窮民註赤石也○周易曰山上有火旅君子以明慎用刑而不留獄澤上有風中孚君子以

議獄緩死山下有火責君子以明庶政無敢折獄又  
曰習坎上六係用徽纆寘于叢棘三歲不得凶王弼  
注曰險陷之地不可升也嚴法峻整難可犯也宜其  
囚執寘于思過之地又曰雷雨解君子以赦過宥罪  
○風俗通云囚道也言詞窮情得以罪誅道也禮罪  
人寘諸圜土故囚字爲口守人此其象也尚書曰囚  
奴正士又曰要囚服念五六日至于旬時不蔽要囚  
鄭玄注云囚拘也王充論衡曰赦令將至則繫室簫  
動獄中人當出故其感應令簫動也詩含神霧云杓  
爲天獄中星虛囚則開出周禮以兩造禁人訟人束



矢于朝然後聽注必以束矢者自表其直也不入則  
不聽也又以兩劑禁人獄入鈞金三日致於朝然後  
聽之注獄相告罪也劑券書也使各齎券書又入鈞  
金三日而聽之亦重刑不入金則自服不直不堅也  
鈞三十斤掌囚職云凡囚者上罪桎梏而桎中桎梏  
下罪桎王之同罪梏有爵者桎以待弊罪梏者兩手  
共一木桎梏兩手各一木在手曰桎在足曰梏

刑獄考卷二十一 終

詩經類考卷之二十二

明武塘沈萬鈞仲容采輯

兵制考

葉時對制談經錄云司馬治軍掌兵也而言掌邦政何也征之爲言正也正天下之不正也易曰師衆也貞正也能以衆正可以王矣剛中而應行險而順以此毒天下而民徙之夫師出於正而猶曰毒天下兵豈先王所樂用也哉諸侯有違命者有憑陵暴犯盜賊者有放弑賊殺亂行者有負固不服犯陵不循荒散不治者不得已隨其罪之大小輕重而以九伐之

法正之觀此則司馬雖曰掌兵而未嘗明民以用武也又况軍藏于六鄉而弗謂軍將藏於六卿而弗謂將以蒐苗獮狩而隱其振旅芟治兵大閱之名以比閭族黨州鄉而易其伍兩率旅師軍之名以井邑丘甸縣鄙而晦其車馬甲士步卒軍賦之名以軍伍而會於教官之司徒以軍禮而掌於禮官之大宗伯以軍禁而徇於刑官之士師司馬雖有其名而無其職則先王不樂用兵之意槩可知矣大抵先王以天下之不可去兵於是乎有治兵之法以武事之不可明民於是乎有寓兵之意四時有田則教兵不爲不先

六卿皆將則畜將不爲不豫尚何待刻畫兵號而明示之以毒天下之具哉

田

周禮大司馬之職中春教振旅司馬以旗致民平列陳如戰之陳辨鼓鐸錫鑠之用王執路鼓諸侯執賁鼓軍將執晉鼓師帥執提旅帥執鼙卒長執鐃兩司馬執鐸公司馬執錫以教坐作進退疾徐疏數之節遂以蒐田有司表貉誓民鼓遂圍禁火弊獻禽以祭社中夏教茆舍如振旅之陳羣吏撰車徒讀書契辨號名之用帥以門名縣鄙各以其名家以號名鄉以

州名野以邑名百官各象其事以辨軍之夜事其他  
皆如振旅遂以蒐田如蒐之法車弊獻禽以享礻中  
秋教治兵如振旅之陳辨旗物之用王載太常諸侯  
載旂軍吏載旗師都載旻鄉遂載物郊野載旄百官  
載旗各書其事與其號焉其他皆如振旅遂以獮田  
如蒐田之法致禽以祀祊中秋教大閱前期羣吏戒  
衆庶修戰法虞人萊所田之野爲表百步則一爲三  
表又五十步爲一表田之日司馬建旗於後表之中  
羣吏以旗物鼓鐸錡鏡各帥其民而致質明弊旗誅  
後至者乃陳車徒如戰之陳皆坐羣吏聽誓於陳前

斬牲以左右徇陳曰不用命者斬之中軍以輦令鼓  
鼓人皆三鼓司馬振鐸羣吏作旗車徒皆作鼓行鳴  
鐸車徒皆行及表乃止三鼓攬鐸羣吏斃旗車徒皆  
坐又三鼓振鐸作旗車徒皆作鼓進鳴鐸車驟徒趨  
及表乃止坐作如初乃鼓車馳徒走及表乃止三闕  
車三發徒三刺乃鼓退鳴鐸且却及表乃止坐作如  
初遂以狩田以旌爲左右和之門車門羣吏各帥其  
車徒以叙和出左右陳車徒有司平之旗居卒間以  
分地前後有屯百步有司巡其前後險野人爲主易  
野車爲主旣陳乃設驅逆之車有司表貉于陳前中

言解類  
軍以鼙令鼓鼓人皆三鼓羣司馬振鐸車徒皆作遂  
鼓行徒銜枚而進大獸公之小禽私之獲者取左耳  
及所弊鼓皆駭車徒皆譟徒乃弊致禽饁獸于郊入  
獻禽以享烝及師大合軍以行禁令以救無辜伐有  
罪若大師則掌其戒令涖大卜帥執事涖釁主及軍  
器及致建太常比軍衆誅後至者及戰巡陳眡事而  
賞罰若師有功則左執律右秉鉞以先愷樂獻于社  
大役與慮事屬其植受其要以待考而賞誅大會同  
則帥士庶子而掌其政令若大射則合諸侯之六耦  
大祭祀享食羞牲魚授其祭○禮記王制曰國君春

田不闢澤大夫不掩羣士不取麇郊又云天子諸侯  
無事則歲三田一爲乾豆二爲賓客三爲充君之庖  
無事而不田曰不敬田不以禮曰暴天物天子不合  
圍諸侯不掩羣天子殺則下大綏諸侯殺則下小綏  
大夫殺則止佐車佐車止則百姓田獵昆虫未蟄不  
以火田不麇不郊不殺胎不殀天不覆巢○按杜預  
注曰蒐索擇取不孕者苗爲苗除害也獮殺也以殺  
爲名順秋氣也狩圍守也冬物畢成獲則取之無所  
擇也○穀梁傳云四時之田皆爲宗廟之事也春曰  
田夏曰苗秋曰蒐冬曰狩公羊傳云春曰苗秋曰蒐



冬曰狩左傳云春蒐夏苗秋獮冬狩○爾雅云春獵  
爲蒐夏獵爲苗秋獵爲獮冬獵爲狩宵田爲獮音火  
田爲狩○春秋繁露云春苗秋蒐冬狩夏獮○白虎  
通云四時之田總名爲田何爲田除害也○易云作  
結繩而爲網罟以佃以漁蓋取諸離○穀梁傳昭八  
年蒐于紅傳云艾蘭以爲防置旃以爲轅門焉覆  
以爲繫旁流握御音計者不得入車軌塵馬候蹄掩  
禽旅御者不失其馳然後射者能中過防不逐不從  
奔之道也面傷不獻不成禽不獻禽雖多天子取三  
十焉其余以與士衆習射于射官

# 師

周易師卦彖云師衆也○周禮小司徒會萬民之卒伍而用之五人爲伍五伍爲兩四兩爲卒五卒爲旅五旅爲師五師爲軍以起軍旅以作田役以比追胥以今貢賦凡起徒役毋過家一人以其余爲羨唯田與追胥竭作司馬序官云凡制軍萬有二千五百人爲軍王六軍大國三軍次國二軍小國一軍軍將皆命卿二千有五百人爲師師帥皆中大夫五百人爲旅旅帥皆下大夫百人爲卒卒長皆上士二十五人爲兩兩司馬皆中士五人爲伍伍皆有長大司馬凡

令賦以地與民制之上地食者參之一其民可用者  
家三人中地食者半其民可用者二家五人下地食  
者參之一其民可用者家二人○鄭志云春秋之兵  
雖累萬之衆皆稱師詩之六師謂六軍之師○鄭周  
易注云多以軍爲名次以師爲名少以旅爲名師者  
舉衆之言○周書云五五二十五曰元卒一卒居前  
曰開一卒居後曰敦左右一卒曰闔四卒成衛曰伯  
三伯一長曰佐三佐一長曰右三右一長曰正三正  
一長曰卿三卿一長曰辟注此謂諸侯三軍數起於  
伍○司馬法萬二千五百人爲軍天子六軍出於六

鄉諸侯大國三軍出於三鄉遂之制五縣二十五鄙  
百二十五鄙五百里二千五百鄰萬二千五百家以  
起政役亦如之王國百里爲郊鄉在郊內遂在郊外  
六鄉謂之郊六遂謂之野○易氏曰先王軍制調兵  
必五數出兵必百數五家爲比則五人之伍五比爲  
閭則五伍之兩以至五黨爲州則五旅之師五州爲  
鄉則五師之軍其積數實起于五人之伍不五數不  
足以調兵也百人之卒成一小陳五百人之旅成一  
中陳二千五百人之師成一大陳萬二千五百人之  
軍成五大陳其積數實起于百人之卒不百數不足

以出兵也○春秋正義家出一人故鄉爲一軍天子  
六軍出於六鄉則大國三軍出自三鄉其餘公邑采  
地之民不在三軍之數鄭注小司徒司馬法云成出  
革車一乘甲士十人徒二十人謂公卿大夫畿內采  
地之制杜注云甸出長轂一乘甲士三人步卒七十  
二人古者用兵天子先用六鄉六鄉不足取六遂六  
遂不足取公卿采邑及諸侯邦國若諸侯出兵先盡  
三鄉三遂鄉遂不足然後總征竟內之兵此一車甲  
士步卒總七十五人周禮大司馬五人爲伍云云大  
數不同者大司馬所云謂鄉遂出軍及臨時對敵布

陳用兵之法此甲士三人步卒七十五人謂徵課邦國出兵之時所徵之兵既至臨陳還同鄉遂之法先偏後伍卒偏之兩千夫長百夫長是臨時對敵皆用卒兩師旅也四丘爲甸據上地言之若以上中下地相通則二甸共出一乘甸卽乘也六十四井出車一乘故以甸爲名

行

周禮云振旅如戰之陳辨鼓鐸錫鏡之用芟舍如振旅之陳辨號名之用治兵如振旅之陳辨旗物之用大閱陳車徒如戰之陳○周書曰春爲牝陳弓爲前

行夏爲方陳戰爲前行季夏爲圓陳牙爲前行秋爲  
壯陳劍爲前行冬爲伏陳楯爲前行是爲五陳○左  
傳鄭伯爲魚麗之陳先偏後伍伍承彌縫衛抹宋鄭  
翩願爲鶴其御願爲鶩爲敖爲宰軍行右轅左追蓐  
前茅慮無中權後勁楚君之戎分爲二廣廣有二卒  
卒偏之兩魯哀公爲支離之卒以侵衛○握奇經云  
四爲正四爲奇余奇爲握奇解云天地風雲爲四正  
龍虎鳥蛇爲四奇○六韜云日月星辰斗柄一左一  
右一向一背此謂天陳丘陵水泉亦有前後左右之  
列此謂地陳用車用馬用文用武此謂人陳

## 振旅

爾雅云出爲治兵尚威武也入爲振旅反尊卑也孫  
炎曰出則幼賤在前貴勇力也入則尊老在前復常  
法也○左傳云三年而治兵入而振旅○穀梁傳云  
出曰治兵習戰也入曰振旅習戰也○公羊傳云出  
曰祠兵入曰振旅其禮一也皆習戰也○周禮中春  
教振旅

## 征伐

周禮大司馬以九伐之法正邦國馮弱犯寡則眚之  
賊賢害民則伐之暴內凌外則壇

音壇

之野荒民散則



削之負固不服則侵之賊殺其親則正之放弑其君則殘之犯令凌政則杜之外內亂鳥獸行則滅之○春秋左傳云有鐘鼓曰伐無曰侵○公羊傳云犝者粗音曰侵精者曰伐○穀梁傳云苞人民毆牛馬曰侵斬樹木壞宮室曰伐

### 六師

劉公瑾云天子六軍出自六鄉蓋萬二千五百家爲鄉凡起徒役毋過家一人故萬二千五百家爲一軍六軍總七萬五千人也○國有三軍法天地人也以五人爲伍五伍爲兩四兩爲卒五卒爲旅五旅爲師

師二千五百人爲一軍六師一萬五千人傳曰一人必死十人不能當百人必死千人不能當千人必死萬人不能當萬人必死橫行天下雖有萬人猶謙讓自以爲不足故復加五千人穀梁傳曰天子有六軍諸侯上國三軍次國二軍下國一軍○王者將出辭于禰還格于祖禰者言子辭面之禮尊親之義也王制曰王者將出類于上帝宜于社造于禰告天示不敢自專非出辭反面之道也與宗廟異義還不復告天者天道質無內外故不復告也

于

爾雅云干扞也孫炎曰干盾自救扞○方言云盾自  
關而東或謂之𦏧或謂之干關西謂之盾什名曰盾  
遜也疏其後避刃以隱遜也大而平者曰吳魁本出  
于吳魁帥所持也隆者曰須盾本出于蜀須所持也  
或曰羗盾言出于羗也狹而短者曰矛盾車上所持  
者也矛小稱也以犀皮作之曰犀盾以縫編板謂之  
木絡又曰狹而長曰步盾步兵所持與刀相配者也  
○六韜云陷堅陣敗強敵武翼大櫓矛戟扶胥七十  
二具案櫓一作櫓大盾也○龍魚河圖曰盾名自障  
○說文云楯𦏧也所以捍身蔽目○周禮云旅賁氏

掌執戈盾夾王車而趨司兵掌五兵五盾各辨其物  
與其等以待軍事司戈楯掌戈楯之物而頒之樂師  
舞有干舞○文王世子云春夏學干戈於東序○春  
秋元命苞云帝桮帶干是謂清明發節移度蓋象招  
搖宋均曰干楯招搖爲天戈戈盾相副戴之者象見  
天中以爲表也○禮書云盾以革爲之其背曰瓦其  
瓦設錫朱質而繪以龍龍之外又繪以雜羽其繫之  
也以繡韋其屬繡韋也以紛書曰敵音敵乃干則敵者  
繫以紛也國語曰輕罪贖以贛音贛盾則贛者繡韋也  
○晁錯云曲道相伏險阨相薄此劍楯之地也弓弩

言系卷六  
三不當一

鼓

周禮鼓人以鼗鼓鼓軍事以金鐃和鼓以金鐃節鼓以金鐃止鼓以金鐃通鼓凡軍旅則鼓鼗軍動則鼓其衆田役亦如之鐃師凡軍之夜三鼗皆鼓之守鼗音戚亦如之大司馬仲春教振旅王執路鼓諸侯執鼗鼓軍將執晉鼓師帥執提旅帥執鼗中冬教大閱鼓人三鼓車徒皆作○左傳曰師之耳目在吾旗鼓又云一鼓作氣再而衰三而竭又云金鼓以聲氣○司馬法云千人之師執鼗萬人之師執大鼓○名物疏

云按武事之鼓有六路鼗晉提鼗鼗也路四面鼓也鼓長八尺面四尺中圍加三之一謂之鼗鄭玄曰卽軍夜之鼗之鼓也陳暘依沈休文云鼗鼓長丈二尺非鼗也長六尺六寸左右端廣六寸中尺厚三寸穹者三之一上三正謂之晉鼓有曲木提持立馬髦上者謂之提鼓之尤小者謂之鼗卽儀禮所謂朔周禮所謂鞀也路鼓本用之鼓鬼享晉鼓本用之鼓金奏鼗鼓亦懸於辟雍鼗鼓亦通於射祭而軍士皆得用之此所謂擊鼓其鏜者非教振旅又非警鼗乃州吁治兵之鼓應是鼗耳

兵

周禮司兵掌五兵五盾各辨其物與其等以待軍事  
凡授兵從司馬之法以頒之用兵亦如之鄭司農云  
五兵者戈殳戟酋矛夷矛鄭康成云車之五兵鄭司  
農所云者是也步卒之五兵則無夷矛而有弓矢○  
考工記云攻國之兵欲短守國之兵欲長句兵欲無  
彈刺兵欲無蝟是故句兵裨刺兵搏○司馬法云弓  
矢圍殳矛守戈戟助凡五兵長以衛短短以救長○  
管子云蚩尤受廬山之金而作五兵○考工記廬人  
云戈殳戟酋矛夷矛乃云六建旣備車不反覆六建

者五兵與人故以爲車之五兵如先鄭說也後鄭知  
徒之五兵無夷矛有弓矢者以司馬法知之且夷矛  
三尋步卒不便於用也然夷矛雖不施於步而弓矢  
未嘗不設於車小戎闕宮所載是也

名物疏

### 受

考工記云車六等之數受長尋有四尺崇於人四尺  
謂之四等又云廬人爲廬器轂兵同強舉圍欲細細  
則校凡爲受五分其長以其一爲之被而圍之參分  
其圍去一以爲晉圍五分其晉圍去一以爲首圍注  
改勾言轂容受無乃舉手所操校疾也被把中也圍



之園之也凡矜八觚晉讀如措矜所捷也首受上鐔也鐔徂釋名曰受殊也長丈二尺而無刃有所撞挫於車上使殊離也○說文云受以杖殊人也周禮爰以積竹八觚長丈二尺建于兵車旅賁以先驅也○周禮司戈盾祭祀授旅賁受徐鉉說文注曰積竹謂削去白取其青處合之取其有力卽今之攢竹法竹極亦此意○司馬法云長兵以衛短兵以守太長則犯太短則不及太輕則閱閱易則亂太犯則不濟故初列卽戟間焉次列受矛間焉又云弓矢圍受矛守戈戟助說文又云受者以木爲身旁皆鐵齒○禮書

云爰所操者二尺四寸圍其所操則非所操者有稜  
矣鄭氏謂矜八觚是也細而能轂則非竹不可許慎  
謂積竹爲之是也詩云伯也執殳爲王前驅又云彼  
侯人兮何戈與殳殳亦殳也蓋殳雖建于車及王行  
則州執而前賓客往來則侯人荷而趨周禮冬官廬  
人殳長尋有四尺卽丈二尺轂兵同強殳無亦可轂  
打人故謂之轂兵同強上下同堅勁也急就篇注曰  
旅賁以先驅者曰殳軍士所執殳者名之校司馬法  
曰執羽從校是也校與殳音同一曰校殳古今字也

捌 附采薇篇服

詩義問云棚所以覆矢也謂箭筒蓋○左傳云公徒執冰而踞服虔云冰積丸蓋也杜預云積丸箭筒也其蓋可以取飲○華谷嚴氏云用矢則舉棚以開箭旣用則納矢筒中釋下棚以覆筒采薇篇魚服釋名云矢其受之器以皮曰箛謂柔服用之也○周禮司弓矢中春獻弓弩中秋獻矢箛及其頒之矢箛皆從其弓田弋克箛箛矢注云矢箛成於堅以獸皮爲之一箛百矢籠竹箛也繕人掌王之用矢箛橐人矢八物皆三等箛亦如之子虛賦所謂夏服童謠所謂箕服卽此也

鬯

疏云鬯者盛弓之器○朱傳云弓囊也與鞬同○說文云鞬弓衣也○禮書云鬯弣鞬鞬皆弓衣也亦曰弓室覲禮言包干戈以虎皮詩言虎鞬而鞬鞬皆從韋則古之弓衣以韋爲之詩言交鞬二弓則一鞬之內皆二弓以備缺折

弓

秋官庭氏掌射國中天鳥若不見其鳥獸則以救日之弓救月之矢射之若神也則以太陰之弓與枉矢射之世本云黃帝命揮作弓山海經曰少皞生般是

始爲弓矢帝俊賜羿彤弓素緇以扶下國墨子曰羿  
作弓孫卿曰倕作弓古今姓纂云黃帝第五子青陽  
生揮爲弓正觀弧星始制弓矢釋名曰弓穹也張之  
穹崇然也其末曰簫言簫梢或曰弣又謂之弣以骨  
爲之滑弣弣也又曰斨曰峻中央曰弣或作拊拊撫  
也所撫持也把中也又曰質簫弣之間曰淵淵宛也  
言宛曲也隈其曲也茭其接也旁曰撻中曰蔽○方  
言云弓謂之韃或謂之續音續龍魚河圖云弓之神名  
曲張○書云和之弓在東房易弦木爲弧剡木爲矢  
弧矢之利以威天下盖取諸睽吳錄云揮觀弧星始

制弧者如張之星也周禮云凡爲弓者各因其君之  
躬志慮血氣鄭玄注云又隨其人之情性明堂位云  
越棘大弓天子之戎器也穀梁傳云偏弓雖矢不出  
疆塲注云偏弓雖矢皆天子之器也○大戴禮云弓  
之銘曰屈伸之義廢興之行無忘自過注曰言得時  
也○曲禮云凡遺人弓者張弓尚勛弛弓尚角注云  
弓有往來體皆欲令其下曲隤然順也○爾雅云弓  
有緣者謂之弓無緣者謂之弭以金者謂之鈇以蜃  
者謂之珧音姚以王者謂之珪○孫卿子云天子雕弓  
諸侯彤弓大夫黑弓禮也○楚成章華之臺酌諸侯

之酒魯君先至楚王悅之與大曲之弓不琢之璧周

禮云豐肉而短寬緩以茶

茶古舒字

若是者謂之危弓危

弓爲之安矢骨直以立忿執以奔若是者爲之安弓  
安弓爲之危矢孫卿子云繁弱柎黍古之良弓○南  
州異物志云烏許國有弧竹皮厚寸餘破以作弓長  
四尺名曰弧弓續漢書鮮卑禽獸異于中國者有野  
馬原羊角端牛以角爲弓俗謂之角端弓魏志云挹  
婁弓長四尺力如弩矢用楛長尺八寸青石爲鏃古  
肅慎氏之國也○又云句麗別種依小水作國因小  
水貊出好弓所謂貊弓是也周官曰司弓掌六弓四

弩八矢之法辨其名物而掌其守藏與其出入六弓  
王弓弧弓夾弓庾弓唐弓大弓疏云天子之弓王弧  
諸侯之弓唐大大夫之弓夾庾士之弓則六弓之外  
弓曲周禮司弓矢掌六弓之法中春獻弓弩及其頒  
之王弓弧弓以授射甲革槌音針質者夾弓庾弓以授  
射豸侯鳥獸者唐弓大弓以授學射者使者勞者天  
子之弓合九而成規諸侯合七而成規大夫合五而  
成規士合三而成規句者謂之檠弓繕人掌王之用  
弓弩橐人弓六物爲三等弩四物亦如之又云弓長  
六尺謂之庇軹五尺謂之庇輪四尺謂之庇軫弓人



爲弓取六材必以其時幹以爲遠也角以爲疾也筋以爲深也膠以爲和也絲以爲固也漆以爲受霜露也凡爲弓冬析幹而春液角夏治筋秋合三材寒莫體冰析漚子召反春被弦則一年之事橋幹欲熟于火而無羸橋音矯欲熟于火而無燂音尋引筋欲盡而無傷其力鬻章品反膠欲熟而水火相得然則居旱亦不動居濕亦不動材美工巧爲之時謂之參均角不勝幹幹不勝筋謂之參均量其力有三均均者三謂之九和弓長六尺有六寸謂之上制上士服之弓長六尺有三寸謂之中制中士服之弓長六尺謂之下制下

士服之往體多來體寡謂之夾庾之屬利射侯與弋  
往體寡來體多謂之王弓之屬利射革與質往體來  
體若一謂之唐弓之屬利射深覆之而角至謂之句  
弓覆之而幹至謂之侯弓覆之而筋至謂之深弓又  
曰凡取幹之道七柘爲上櫜次之檠桑次之橘次之  
木瓜次之荆次之竹爲下○三禮圖云彤弓天子所  
用旅弓卿以下所用也說文云弣畫弓也菡角弓也  
弧木弓也權弓曲也繇弓便利也彊弓急張也彌弓  
疆貌也汧滿弓有所向也○列女傳云弓工妻者繁  
人之女也晉平公使弓人爲弓三年乃成平公引弓

而射不穿一札公怒將殺弓人其妻見公曰妾之夫  
造此弓其爲之亦勞矣其幹生泰山之阿傳以燕牛  
之角纏以荆麋之筋糊以阿魚之膠此四者天下之  
妙選也而君不能穿一札是君不能射也而反欲殺  
之夫不亦謬乎妾聞射之道左手如拒右手如附枝  
右手發之左手不知此射之道也平公以其言而射  
穿七札乃賜其夫金三鎰

介

說文云鎧甲也鈇

侯肝反

臂鎧也鈹

烏牙反

鍛頸鎧也○

世本云杼作甲宋衷曰少康之子○周禮司甲下大

夫二人中士八人考工記云燕之無函也非無函也  
夫人而能爲函也又云函人爲甲犀甲七屬兕甲六  
屬合甲五屬凡爲甲必先爲容然後制革權其上旅  
與其下旅而重若一以其長爲之圖凡甲鍛不挈則  
不堅已敝則撓凡察革之道眡其鑽空而窻音完則革  
堅眡其旁而易則材更眡其朕而直則制善紫之而  
約則周也舉之而豐則明也衣之無齡音憾則變也○  
少儀云國家靡敝甲不組滕○家語云家不藏甲○  
管子云葛盧之山發而出水金從之蚩尤受而制之  
以爲劍鎧○荀子云楚人鮫革犀兕以爲甲堅如金

石○漢書云甲不堅密與袒裋同此將不省兵之禍也○初學記云甲下飾謂之裳見左傳甲藏謂之纍見國語甲衣謂之褰見禮記○禮書云甲亦曰介曰函曰鎧則甲猶植物之有甲也介猶互物之有介也函所以周其身鎧所以致其愷經言甲而不及鎧則古者之甲以革爲之後世乃用金耳詩曰駟介彭彭又曰伐駟孔羣左傳曰不介馬而馳之鄭氏曰伐淺金也秦人以淺金甲馬古或用革與否不可考也

矛 英 喬

矛銳底曰鑕平底曰鐔○方言云矛骹細如雁頸者

謂之鶴膝按骹音敲脛也○釋名云矛冒也外下冒  
矜也夷矛夷常也其矜長丈六尺不曰常而曰夷者  
言其可夷滅敵亦車上所持也○方言云矛吳楊江  
淮南楚五湖之間謂之鉞音施或謂之鉞七恭反或謂之  
鋌其柄謂之矜○世本云杼作矛○考工記云廬人  
爲廬器首矛常有四尺夷矛三尋刺兵屬矛同強舉圍  
欲重重欲傳人傳人則密是故侵之凡爲首矛參分  
其長二在前一在後而圍之五分其圍去一以爲晉  
圍三分其晉圍去一以爲刺圍○禮書云說文曰矛  
象形然則自考工言之則爲刺兵自說文言之則爲

勾兵蓋矛之爲器上銳而旁勾上銳所以象物生之  
芒旁勾所以象物生之勾曾言其就夷言其易短者  
其體就長者其體易此矛之辨也鄭氏曰矛戟柄竹  
攢秘則矛之柄亦以竹矣然詩云矛鋈鏃說文云鋌  
小矛也風俗通曰矛長八尺謂之稍音朔則矛之制固  
不一矣○英閼宮疏云蓋絲纏而朱染之以爲矛之  
英飾○王氏云英之以毛羽○朱傳云以朱羽爲矛  
飾○喬傳云重喬累荷也箋云喬矛矜近上及室題  
所以懸毛羽疏室矛之登孔題表識也箋申傳意言  
矛柄近于上頭及矛登室之下有旌以題識之其題

識者所以懸毛羽二矛於其上題皆懸毛羽以題識之似重累相負荷然故謂累荷○朱傳云矛之上句曰喬所以懸英○名物疏云按孔疏云絲纏喬云懸羽則與朱傳言喬所以懸英者異矣釋文累荷之荷舊音何云刻矛頭爲荷葉則與鄭箋不合孔云箋申傳意蓋取沈氏兩矛飾相負荷之說也然孔閔宮疏解朱英絲纏本無的據故云蓋以疑之鄭云矛有毛羽亦指時驗朱云矛之上句曰喬蓋緣爾雅木上句曰喬以類推知之並非確證韻會注喬字居秋切者云又矛矜也然則鄭以矛矜爲喬下二句或并解喬



言類卷之六 兵部卷之六  
之飾耶果爾則當讀居祇切下當讀渠驕切韓詩又  
作鵠字不知何解或曰鵠雉名雉飛高止一丈長止  
三丈一起卽下故矛旁謂之喬下向而曲狀如雉飛  
見日久英弊所存者喬耳諸說紛然予謂不若直從  
毛氏毛云重喬累荷也蓋爾雅喬之詁爲高矛建于  
車五兵之最高者也酋矛短夷矛長重累而見故曰  
重猶云重英耳豈有他義乎○龍魚河圖云矛名天  
矢陰太公兵法云矛之神名跌踰尉繚子云殺人于  
百步之外者弓矢也殺人于百步之內者矛戟也吳  
越春秋云越以一之矛步光之劍獻之吳王春秋

運斗樞云行室遙光則矛生角矛生角則有赤風

### 斧

釋名云斧甫也甫始也凡將制器始用斧伐木已乃制之也○考工記五分其金而錫居一謂之斧斤之齊○春秋元命苞云斧鑕主亂行斬狂詐斧之爲言補也○古今事物類考云神農作斤斧皇圖要記亦云○破斧傳云隋盞曰斧○尉繚子云坐之兵劒斧立之兵戟弩

### 侯

尚書云侯以明之○周禮司裘云王大射則共虎侯

熊侯豹侯設其鵠諸侯則共熊侯豹侯卿大夫則共  
康侯皆設其鵠射人以射法治射儀王以六耦射三  
侯樂以騶虞九節立正諸侯以四耦射二侯樂以貍  
首七節三正孤卿大夫以三耦射一侯樂以採蘋五  
節二正士以三耦射豝侯樂以采蘋五節二正若王  
大射則以貍步張三侯祭侯則爲位梓人爲侯廣與  
崇方參分其廣而鵠居一焉上兩個與其身三下兩  
个半之上綱與下綱出舌尋纈千貧寸焉張皮侯而  
棲鵠則春以功張五采之侯則遠國屬張獸侯則王  
以息燕○鄉射記云凡侯天子熊侯白質諸侯麋侯

赤質大夫布侯畫以虎豹士布侯畫以鹿豕凡畫者  
丹質又云鄉侯上个五尋中十尺侯道五十弓弓二  
寸以爲侯中倍中以爲躬倍躬以爲左右舌下舌半  
上舌○大射云司馬命量人巾車張三侯太侯之崇  
十參七十干五十遂命量人巾車張三侯太侯之崇  
見鵠于參參見鵠于干干不及地武○鄭注周禮云  
所射正謂之侯者天子中之則能服諸侯諸侯以下  
中之則得爲諸侯○孔氏云燕射自天子至士皆一  
侯鄉射賓射當張采侯二正天子諸侯大射張三侯  
○禮書云周官司裘所共之侯大射之侯也梓人所

謂張皮侯而棲鵠也射人治射儀之侯正賓射之侯也梓人所謂張五采之侯也鄉射記熊侯白質以下燕射之侯也梓人所謂張獸侯以息燕也大射之侯用虎熊豹麋之皮飾其側而中又制皮以爲鵠賓射之侯亦虎熊豹麋之皮飾其側而中畫五色以爲正燕射之侯則畫熊麋虎豹鹿豕之形以象鵠此三射之別也然司裘諸侯熊侯豹侯則畿內諸侯大射之禮也畿外諸侯大侯參侯干侯大射禮量人張三侯是也

正

鄭射人注云考工梓人職曰張五采之侯則遠國屬遠國謂諸侯來朝者也五采之侯卽五正之侯也正之言正也射者內志正則能中焉畫五采之侯中朱次白次蒼次黃玄居外三正損玄黃二正去白蒼而畫以朱綠其外之廣皆居侯中參分之一中二尺今儒家云四尺曰正二尺曰鵠鵠乃用皮其大如正此說失之矣○大射注云正者正也亦鳥名齊魯之間名題肩爲正正鳥之捷黠者射之難中以中爲俊故射取名焉○詩正義云正者侯中所射之處大射則張皮侯而設鵠賓射則張布侯而畫正正大如鵠三

分侯廣而正居一焉侯身長一丈八尺者正方六尺  
侯身一丈四尺者正方四尺六寸大半寸侯身一丈  
者正方三尺三寸少半寸正以采畫爲之畫五正之  
侯者中央之采方二尺以外準其采之多少正之廣  
挾均布之以至于外畔也○禮書云大射有鵠猶賓  
射之有正也賓射有皮猶大射之飾其側也大射側  
中皆皮故曰皮侯賓射側皮而中五采故曰五采侯

矢

釋名云矢指也言其有所指向迅疾也又謂之箭前  
進也其本曰足其形似木木以下爲本本以根爲足

也又謂之鏑鏑敵也可以禦敵也齊人謂之鏃鏃族也言所中皆族滅也關西謂之釭釭鉸也言有鉸刃也其末曰括括會也言與弦會也括旁曰义形似义也其受矢之器以皮曰箛柔服之義也織竹曰箙相迫箙之名也步义人所帶以箭义于其中也馬上曰鞬鞬建也言弓矢並見于其中也○方言云自關而東謂之矢江淮之間謂之鏃關西曰箭注箭者竹名因以爲號又曰凡箭鏃三者謂之羊頭其廣薄而長薄謂之鏃○世本云夷牟作矢牟黃帝臣也○孫卿子浮游作矢○唐六典云骨鏃曰髀音鏃鏃曰鏃鳴



箭曰箛霹葉曰鉞音皮皆古之制也竹箭以竹爲箛諸  
箭亦通用木箭以木爲箛惟利射獵○太公兵法云  
矢之神名續長○韓詩傳云諸侯有德七錫弓矢○  
春秋元命苞曰矢附于矢星四射注曰四射四方射  
之也○考工記曰燕之角荆之幹妣胡之箛吳越之  
金錫此材之美也鄭注妣胡胡子之國在楚旁箛矢  
幹也○周官司弓矢掌八矢之法一曰枉二曰絜三  
曰殺四曰鏃五曰矰六曰第第七曰恒八曰庫凡枉矢  
絜矢利火射用諸守城車戰殺矢鏃矢用諸近射田  
獵矰矢第矢用諸弋射恒矢庫矢用諸散射此八矢

者弓弩各有四焉枉殺矰恒弓所用也絜鏃第庫弩  
所用也冶氏爲殺矢刃長寸圍寸鋌十之鏃徒重三  
罔音換矢人爲矢鏃矢三分第矢三分注第當一在前  
二在後兵矢田矢五分注謂枉二在前三在後殺矢  
七分三在前四在後三分其長而殺其一五分其長  
而羽其一以其筈厚爲之羽深水之以辨其陰陽夾  
其陰陽以設其比夾其比以設其羽三分其羽以設  
其刃雖有疾風亦不憚之矣又云前弱則俛後弱則  
翔中弱則紆中強則揚羽豐則遲羽殺則趨故夾而  
搖之以砥其豐殺之節撓之以視其鴻殺之稱又云

凡相筈欲生而搏注筈幹字也相擇也生無瑕蠹搏  
圓也尚書曰垂之竹矢在東房孔注云垂舜共工所  
爲中法故傳寶之○陳琳武庫賦云矢則申息肅慎  
箇簞空流焦銅毒鐵簞鏃鳴鏃○博物志云交州山  
夷名曰俚子弓長數尺箭長尺餘以焦銅爲鏃塗毒  
藥于鏃鋒中人卽死六韜云陷堅陣敗強敵大黃參  
連弩飛鳧電影矢自副注曰飛鳧赤莖白羽以鐵爲  
首電影青莖赤羽以銅爲首皆矢名楚王張繁弱之  
弓載忘歸之矢以射蛟兕于雲夢列子云善射者能  
令後鏃中前括發發相及矢矢相屬前矢造準而無

絕落後矢之括猶銜弦視之若一焉○三禮圖盧矢長三尺○山海經云東海之外有大人之國郭璞注曰晉永加二年有鷺鳥集于始安縣南廿里之鷺波民周虎張得之木矢貫之鐵鏃其長六尺有半以箭計之其射者人身應長一丈五六尺也

板

疏云板爲矢末以鏃爲首故板爲末○釋名云矢末爲括括會也言與弦會也括旁曰叉形似叉也○太甲曰若虞機張往省括于度則釋○考工記矢人爲矢夾其陰陽以設其比夾其比以設其羽鄭司農云

比謂括也○禮書云弓矢之括居棗兩旁弩矢之括居棗上下

公矛

傳云公三隅矛也○釋名云仇矛頭有三義言可以討仇敵之矛也○書曰二人執惠一人執銳孔安國曰惠三隅矛銳矛屬

鐔

曲禮云進戈者前其鐔

在國反

後其刃進矛戟者前其

鏃後其銳注銳底曰鐔取其鐔地平底曰鏃取其

伐

疏云櫓是大盾伐爲中干干伐皆盾之別名

閉

儀禮注云韋弓檠也弛則傳之干弓裏備損傷也以竹爲之詩云竹閉緹滕○考工記云凡爲弓寒奠體則張不流注至冬膠堅內之檠中定往來體流猶移也又云恒角而達譬如終繼注繼謂弓韋○禮書云韋以竹爲之狀如弓然約于弓裏命之曰閉所以備損傷也韋以閉之故亦謂之閉緹以繫之故亦謂之繼如此則納之韋中足以定往來之體祛翻反之矣

戈

說文平頭戟也○釋名云戈勾子戟也戈過也所刺  
擣則決過所鈎引則制之弗得過也○曲禮疏云戈  
鈎子戟也如戟而橫安刃但頭不向上爲鈎也直刃  
長八寸橫刃長四寸接柄處長四寸並廣二寸○禮  
書云五兵之便於用者戈而已其柄短而易持其胡  
援廣而易入可以擣可以擊可以鈎然戈勾  
兵也或謂之鷄鳴或謂之擁頸皆指其胡名之也○  
周禮司戈盾掌戈盾之物而頒之考工記四分其金  
而錫居一謂之戈戟之齊戈柄柄也六尺有六寸冶氏  
爲戈廣二寸內倍之胡內接胡三之戈之援四之直援

办已倨則不入已句則不決長內則折前短內則不疾是故倨句外搏廣其本重三鈺音厲一廬人爲廬器勾兵欲無彈戈戟屬彈掉也是故勾兵枹側方去毆兵同強舉圍欲細細則校也○曲禮云進戈者前其鐔後其刃孔疏云刃當頭而利者也利故不持向人也

### 戟

釋名云戟格也旁有枝格也○說文云戟有枝兵也長丈六尺○方言云戟楚謂之予凡戟而無刃秦晉之間謂之鈇音或謂之鏃音吳楊之間謂之戈東齊秦晉之間謂其大者曰鏃胡其曲者謂之鈎鈇鏃鏃胡



三刃枝南楚宛郢謂之偃戟其柄自關而西謂之棧  
或謂之爻○廣雅偃謂之雄戟○考工記云車戟長  
崇於爻四尺冶氏爲戟廣寸有半寸內三之胡四之  
援五之倨勾中矩與刺重三鈔又云桃氏爲刃四分  
其金而錫居一謂之戈戟之齊○禮書云戟或作棘  
有三鋒刺則鋒之直前者也胡則正方中短而下垂  
者也援則磬折而上達者也楚武王荊尸授師子先  
儒謂之戟書一人執殽音一人執瞿先儒以爲戟屬  
則戟之異名多矣○漢書晁錯上言曰兩陣相近平  
地淺草可前可後此長戟之地也劍楯三不當一○

風土記云植則龍虎交牙神變無常注曰言用雙戟之法交軹相向左手爲龍右手爲虎更出更入更上更下上下無常隨變而改顛倒入懷轉如面風○太公兵法云戟之神名大將○風土記云戟長一丈三尺奮揚俯仰能兼五兵

折

傳云折方釜也疏云折卽斧也惟釜孔異耳○釋名云折戕也所伐皆折毀也

枚

周禮大司馬中冬教大閱車徒皆作遂鼓行徒銜枚

而進注云枚如箸銜之有續音結項中軍法止語爲相疑惑銜枚氏掌司蹕國之大祭祀令禁無蹕軍旅田役令銜枚

鐻

傳曰鑿屬曰鐻○韓詩云木屬

鉞

傳曰木屬曰鉞○韓詩云鑿屬也一解云今之獨斧頭柯

考工記車人云柯長三尺博三寸厚一寸有半五分其長以其一爲之首注云首六寸謂關頭斧也柄其

柄也又云半矩謂之宣一宣有半謂之櫨一櫨  
有半謂之柯一柯有半謂之磬折

弭

爾雅云弓有緣者謂之弓無緣者謂之弭孫炎曰緣  
謂繳束而漆之弭謂不以繳束骨飾兩頭者也○左  
傳云左執鞭弭○鄭氏云弭以助御者解轡紛宜骨  
也○孔氏云弭者弓梢之名

旄

周禮司常云龜蛇爲旄又云及國之大閱贊司馬頒  
旗物縣鄙建旄疏云縣鄙是遂之官互約言之鄉之

間比遂之鄰同建旐龜蛇象其捍難避害也○夏官大司馬云治兵辨旗物之用郊野載旐注云郊謂鄉遂之州長縣鄙以下野謂公邑大夫載旐者以其將羨卒也○考工記云龜蛇四旐以象營室也○爾雅云緇廣克幅長尋曰旐○禮記云行前朱雀而後玄武左青龍而右白虎招搖在上急繕讀曰勁其怒○釋名云龜蛇爲旐旐兆也龜知氣兆之吉凶建之於後察度事宜之形兆也

## 旂

司常云交龍爲旂又云及大閱贊司馬頒旗物諸侯

建旗註云諸侯畫交龍一象其升朝一象其下復巾車云金路建大旗以賓同姓以封大司馬治兵諸侯載旂考工記云龍旂九旂以象大火也○覲禮云諸侯載龍旗弧韞又云天子載大旗升龍降龍○樂記云龍旂九旂天子之旌也○爾雅云素升龍於繆練旒九有鈴曰旂○史記云龍旂九旒所以養信也○司馬法云旂夏后氏玄首人之執也殷白天之義也周黃地之道也○孔書云天子諸侯之旂龍章一也升龍素降龍青蓋青陽也素陰也陽在上而降陰在下而升交泰之道也先儒以爲王之大常曳地諸侯

之旂齊軫卿大夫齊較士齊肩

### 彤弓

傳云朱弓也以講德習射○左傳審武子云諸侯敵王所愾而獻其功王於是乎錫之彤弓一彤矢百旅弓矢千以覺報宴旅音盧○禮記云諸侯賜弓矢然後專征伐○孔疏云弓皆漆之以禦霜露彤弓周禮當唐弓大弓往體來體若一合七成規彤矢當周禮恒矢也色以赤者周之所尚

### 常

傳云日月爲常○周禮司常日月爲常巾車王乘玉

路建太常十有二旂以祀大司馬教治兵王載太常  
司勛凡有功者銘書于王之太常○覲禮天子乘龍  
載大旂象日月升龍降龍○郊特牲云旂十有二旒  
龍章而設日月象天也○鄭氏云春夏之田用大麾  
秋冬建太常王之自將建太常不自將建太白○禮  
書云常有三辰升龍降龍設崇牙備弧矢崇牙者為重牙也鄭氏謂  
以飾旒之側飾之以旒垂之以鈴考工記曰弧旌  
枉矢以象弧明堂位曰乘大輅載弧韉左傳曰錫鸞  
和鈴爾雅曰有鈴曰旂則太常之制可知矣太常不  
特祀天至於拜日拜月祀方明禮四瀆禮山川秋治



兵冬大閱皆載焉然常之三辰則北斗而已與衣服  
畫星辰不同觀曲禮曰招搖在上穆天子傳曰天子  
堊盛姬建日月七星蓋旗以指物所畫不過北斗耳

### 織文

箋云織徽織也將帥以下衣皆著焉疏云言徽織者  
以其在軍爲徽號之織織與幟同染絳爲繆畫爲鳥  
隼又絳爲旒書名于末其制如王之旌旗而畫之著  
之於衣自王以下旌旒雖有等差其徽織同長三尺  
繆長一尺旂長二尺○周禮司常掌九旗之物名各  
有屬以待國事日月爲常交龍爲旂通帛爲旌樛帛

爲物熊虎爲旗鳥隼爲旟龜蛇爲旐全羽爲旂析羽  
爲旛及大閱官府各象其事州里各象其名家各象  
其號注云物名者所畫異物則異名也屬謂徽幟也  
大傳謂之徽號事名三者旌旗之細也士喪禮爲銘  
各以其物亡則以緇長半幅頽末長終幅廣三寸書  
名于末大閱禮象而爲之兵凶事若有死事者亦當  
以相別也○大司馬教茆舍辨號名之用帥以門名  
縣鄙各以其名家以號名鄉以州名野以邑名百官  
各象其事○呂東萊云日月爲常之類皆幟之文也  
鳥章特其一耳詩之所指乃其所建之旗鄭氏所箋

乃所服之號初非一物

白

孔氏曰白謂絳帛○尚書曰舜修三帛○周禮染人掌染帛肆師大祀用玉帛典命諸侯之適子未誓以皮帛繼子男閭師民不蚤者不帛職方氏并州其利布帛帛音幌音氏練帛○坊記云禮之先幣帛也欲民之先事而後祿○易曰賁于丘園束帛戔戔○說文帛

白旆

毛傳云白旆繼旄者也疏云此旗而言旆者散則通名九旆之帛皆用絳言白旆者謂絳帛猶通帛爲旆

亦是絳也○爾雅云緇廣充幅長尋曰旒繼旒曰旒  
注云帛續旒末爲燕尾者○曹氏曰白旒以帛續旒  
末爲燕尾戰則旒之○名物疏按繼旒曰旒出于爾  
雅郭注所云續旒末爲燕尾義見詩者卽此白旒央  
央也然則旒是旂身旒是旂尾考之詩圖則一車中  
有兩旂其一旂畫朱鳥卽織文鳥章其一則旒別自  
爲一竿有旌有兩飄帶其所謂緇廣充幅長尋與燕  
尾之形並無有焉詩圖出于後儒固不足信不可據  
以疑爾雅然此詩下文云元戎十乘以先啓行則旒  
蓋建于元戎之上者元戎軍之前行凡師前朱雀而

後玄武恐不得建旒也鄭氏以織爲著之於衣故孔氏解毛傳繼旒曰旒以爲旗旒散則通名此說經傳無文毛意當是據爾雅不得與鄭同也左傳說旒多矣杜氏注各不同莊二十八年子元鬪御強鬪楮耿之不比爲旒注云子元自與二子特建以居前廣充幅長尋曰旒繼旒曰旒僖二十八年狐毛設二旒而退之注云旒大旒也建二旒而退若使大將稍却又亡大旒之左旒注云大旒旂名繫旒曰旒通帛曰旂宣十二年令尹南轅反旒注云迴車南向旒軍前大旒昭十三年合諸侯于平丘八月辛未治兵建而不

旆王申復旆之注云建立旆旗不曳其旆旆游也軍  
將戰則旆故曳旆以恐之哀二年陽虎以兵車之旆  
與罕駟兵車先陳注云旆先驅車也傳士凱反復其  
說以事推之知子元之旆陽虎之旆軍前大旗也狐  
毛所說與亡大旆之旆建而不旆之旆大將所建大  
旗也所云建者旗之竿耳如傳氏之說則此白旆央  
央者卽軍前大旆故建於元戎之上孔氏亦云軍行  
之次旆最在先是也若是繼旆之旆乃後軍所建矣  
旆之末不妨有旆顧非此旆耳至杜以旆爲旂尤是  
臆說旂如垂水之勢數之多寡不同非燕尾之形也

若杜此注不從爾雅則旌旂旣建但結其旂旗是大  
物旣以建矣反以旂之舒結爲戰不戰之候晉之軍  
容何太不彰明乎

### 鉦鼓

說文云鉦鐃也鐃小鉦也似鈴無舌柄中上下通鐃  
鉦也軍法卒長執鐃○孔氏云鐃鐃俱得名鉦但鐃  
以節鼓非靜之義故知鉦以靜之指謂鐃也凡軍進  
退皆鼓動鉦止非臨陳獨然依文在陳師鞠旅之上  
是未戰時事○黃帝出軍訣云牙旂者將軍之精鉦  
鼓者將軍之氣一軍之形候也○周禮鼓人以金鐃

節鼓以金鐃止鼓注云鐃鉦也形如小鍾軍行鳴之以爲鼓節鐃如鈴無舌有秉執而鳴之以止擊鼓大司馬職云中春教振旅辨鼓鐸鐃鐃之用卒長執鐃公司馬執鐃以教坐作進退疾徐疏數之節中冬教大閱車徒皆作鼓行鳴鐃行及表乃止又三鼓車徒皆作鼓進鳴鐃車驟徒趨及表乃止坐作如初乃鼓車馳徒走及表乃止鼓戒三闕車三發徒三刺乃鼓退鳴鐃且卻及表乃止坐作如初○樂記曰今夫古樂始奏以文復亂以武疏云武謂金鐃○樂書云國語曰鼓丁寧韋昭曰丁寧鉦也蓋自其聲濁言之謂



言終類考 卷之三  
之鐺自其倣人言之謂之丁寧自其正人言之謂之  
鉦周禮卒長執鐺以其聲詭詭然故以鉦名漢鼓吹  
曲有鐺歌所以退武舞也豈亦周之遺制與 周禮  
鼓人掌六鼓四金之音聲以節音樂以和軍旅教爲  
鼓而便其聲用又鼓人職云以鼗鼓鼓軍士鼗鼓長  
八尺凡軍旅夜鼓鼗鄭注云鼗鼓戒守鼓也司馬兵  
法曰昏鼓四通爲大鼗夜半三通爲晨戒旦明五通  
爲發晌○周禮馬上之鼓曰提鼓有木可提執也

拾

三禮圖云撻

音遂

者臂捍以朱常爲之謂之撻者所以

遂弦也○周禮繕人掌王之用決拾注拾謂韝杆也  
著左臂裏以韋爲之○禮書云拾亦謂之遂儀禮所  
謂袒決遂是也亦謂之捍內則所謂佩決捍是也鄉  
射記大夫與士射袒熏襦燕禮記君射袒朱襦蓋大  
夫與士射士則以拾蔽膚君斂衣而已鄭氏謂拾所  
以蔽膚斂衣者此也曲禮曰野外軍中無摯以纓拾  
矢可也則拾亦可以爲摯與

棘

疏云矢鏃之角爲棘古有此名○韓詩作枋音枋也

刀

什名曰刀到也以斬伐到其所乃擊之也其末曰鋒  
言若鋒刺之毒其本曰環形似環或曰皇帝採首山  
之金始鑄爲刀○周禮考工記云鄭之刀宋之斤魯  
之削吳越之劍遷其地不能爲良地氣然也○春秋  
繁露云刀在右白虎之象也○六韜云大櫓刀重八  
斤柄長六尺三百枚○魏文帝露陌刀銘云於鏢良  
刀胡練亶時譬茲麟角靡所任茲不逢不若永世保  
持利用衛身以威弗治○物理論云古有阮師之刀  
天下所寶貴也龍魚河圖云有脫光刀崔豹古今注  
云漢文帝有百練青犢漏影三刀○續漢書云龍鱗

御刀也孟勞魯之寶刀也典論云周魯寶赤刀孟勞  
○魏武策軍令云孤先在襄邑有起兵意與主師共  
作單手刀○初學記曰歷代有吳刀赤刀容刀鸞刀  
○樂府歌云始出在西門遙望秦氏廬秦氏有好女  
自名爲女休女休十四五爲宗行報仇左執白陽刀  
右據宛景矛○吳喜志林曰古人鑄刀以五月丙午  
取純火精以協其數

### 劍

管仲曰葛天之廬山發而出水金從之出蚩尤受而  
制之以作劒戟傳玄劍銘云道德不修雖有千金之

劍何所用之先王觀變而服劍所以立武象也太上有象而已其次則親用之○春秋繁露云劍之在左青龍象也劍之在右白虎象也○釋名曰劒檢也所以防檢非常也○集韻曰鐔劒口也字林曰璚劍鼻也○方言曰鞞謂之室說文曰鞞劍衣也亦曰褱音遠周官桃氏爲劍臘廣二寸有半寸臘謂兩從半之兩面殺趨鐔者以其臘廣爲之莖圍長倍之莖謂劍交人中其莖設其後謂從中以身長五其莖長重九鏘謂之上制上士服之身長四其莖長重七鏘謂之中制中士服之身長四其莖長重五鏘謂之下制下士服之

太公金匱劔銘云德行則福德廢則覆大戴禮劔銘云帶之以爲服動必行德行德則興倍德則崩○龍魚河圖曰流州在西海中上多積石名爲昆吾石冶其石成鐵作劔光明四照洞如水精割玉如泥又曰劔名飛揚○吳越春秋越王允常聘毆冶子作名劔五一曰純鉤二曰湛盧三曰豪曹或曰盤郢四曰魚腸五曰鉅闕○抱朴子云以五月丙午日鑄劔五口下其銅于神爐中以桂薪燒之以剛炭鎔之令童男女進火劔成各長三尺六寸五分帶之入水則蛟龍不敢近人○于將與妻莫耶作劔二枚陽曰于將陰

曰莫耶○楚王令風胡子之吳見毆冶子干將使作  
鐵劍毆冶子干將鑿茨山洩其鐵取鐵英作爲鐵劍  
三枚一曰龍淵二曰泰阿三曰工市○楚昭王卧寤  
而得湛露之劍問風胡子風胡子曰湛露五金之  
英太陽之精可以折衝拒敵然人君有逆理之謀其  
劍卽出故去無道以就有道吳越春秋○崔豹古今注云  
吳太皇帝有寶劍六一日白虹二曰紫電三曰辟邪  
四曰流星五曰青冥六曰百里○孫卿子曰桓公之  
慈太公之闕文王之琢莊君之忽闔閭子干將莫耶  
巨闕辟閭皆古良劍也○古時多以銅爲兵其據甚

多山海經曰昆吾之山其山多赤銅郭璞注曰此山  
出金如火以之切玉如切泥也周穆王時西戎獻之  
尸子所謂昆吾之劍也越絕書曰赤瑾之山破而出  
錫若耶之溪涸而出銅毆冶鑄以爲純鉤之劍又汲  
郡冢中得一銅劍長三尺五寸今所記于將者亦皆  
非鐵明古者以錫銅爲兵器也周書稱穆王時征犬  
戎得昆吾之劍火浣布長尺有咫又有鍊銅赤刀割  
王如泥焉又左傳僖公十八年鄭伯始朝于楚楚賜  
之金旣而悔之盟曰無以鑄兵故以鑄三鍾杜預注  
云楚金利故也韓子稱昔智伯繇之伐趙襄子初晉



陽襄子金將盡問於張孟談孟談對曰吾聞董安于  
治晉陽也公室悉以銅爲柱質君可發而用之於是  
發之有餘金矣且荆軻刺秦王之日匕首擊銅柱銅  
柱火出則古者非直以銅爲匕首亦以爲殿柱也後  
世爭攻紛亂兵革互興銅不克給故以鐵足之故銅  
兵轉少鐵兵轉多漸染流遷遂成風俗所以鐵工比  
肩而銅工稍絕張華博物志亦稱鑄銅之工不可復  
得唯蜀地羗中時有解者梁江淹見人于古冢墓得  
銅劍作銅劒讚略如所纂

升庵集

鸞刀

正義云鸞卽鈴也謂刀環有鈴其聲中節○禮記曰  
割刀之用而鸞刀之貴貴其義也聲和而後斷也又  
云祭之日君牽牲入廟門麗于碑卿大夫袒而毛牛  
尚耳鸞刀以割取腍膋乃退爛祭祭腥而退敬之至  
也○何休云鸞刀宗廟割切之刀環有和鋒有鸞○  
名物疏按禮記卿大夫袒而毛牛尚耳則人君祭禮  
執鸞刀者固謂卿大夫也考之儀禮特牲則曰主人  
立於門戶視側殺少牢則曰主人卽位於廟門之外  
司馬割羊司士擊豕宗人告備乃退則士大夫猶視  
殺而不親割矣王介甫劉執中乃謂王執鸞刀以親

殺此何據耶朱子云主人親執蓋沿王氏之誤國語  
云天子郊禘之事必自射其牲諸侯宗廟之事必自  
射其牛亦不云執刀以殺也

### 鞞

傳云容刀鞞也○說文云刀室也○左傳云藻率鞞  
鞞音孔昭其數也○內則子事父母右佩鞞音孔注云  
遺刀鞞也○名物疏案鞞琫琕三字之義爾雅無文  
故此傳云鞞容刀鞞也琫上飾琕下飾公劉傳云下  
曰鞞上曰琫孔氏曰鞞者刀鞘之名琫者鞘之上飾  
下不言其飾指鞞之體故曰下曰鞞上則有飾可名

故曰上曰琫是毛說本矛盾孔亦不得已而爲之詞也釋名因之曰下末之飾曰琕琕卑也在下之言琕當是鞞字與毛公劉之傳同杜氏左左傳注則以鞞爲上飾鞞爲下飾又倒置無據劉規其過是也仲達不得爲之佞臣

### 琕琫

毛傳云琫上飾琕下飾天子玉琫而琕於部琕諸侯琕音琕琕而琕奇琕友琕大夫琕音琕琕而琕琕音琕琕琕音琕琕琕音琕○說文云琕屨甲所以飾物也○爾雅云黃金謂之琕其美者謂之鏐白金謂之銀其美者謂之鏐

郭璞云鐐卽紫磨金也○釋文云璆音蚪王也鏐又作璆王也

敦弓

荀子云天子雕弓諸侯彤弓大夫黑弓禮也○何休公羊注云天子雕弓諸侯彤弓大夫嬰弓士盧弓○孔氏云冬官弓人云天子之弓合九而成規又云往體寡來體多謂之王弧此敦弓卽彼王弧也

鏐

爾雅云金鏐翦羽謂之鏐骨鏐不翦羽謂之志郭璞曰金鏐金鏐音批箭也骨鏐金骨皮教也○方言云

矢江淮之謂之鏃○周禮司弓矢鏃矢用諸近射  
田獵注云鏃之言候也可以司候射敵之近者及禽  
獸前尤重中深而不可遠也又矢人爲矢鏃矢參分  
一在前二在後注云參訂之而平者前有鐵重○禮  
書云翦羽尚疾不翦羽尚舒尚疾則以金鏃而必其  
入尚舒則以骨鏃而防其傷

戚

傳云戚斧也○釋名云戚戚也斧以斬斷見者皆戚  
懼也

揚

傳云揚鉞也疏云鉞大而斧小太公六韜云大柯斧重八斤一名天鉞○劉存事始案輿服志曰黃帝制以銅爲鳳首銜刃古今注云金斧黃鉞也鐵斧玄鉞也三代通用之武王以黃鉞斬紂太公以玄鉞斬妲己將軍出征授黃鉞者亦以銅爲之○韓詩外傳云諸侯有德八錫鉞鉞說文云鉞大斧也本作戊夏執玄戊殷執白戚周左使黃戊右把白旄三都賦云建黃鉞以禦姦淮南子云至精之感無所不通昔武王渡河而陽侯之波逆流而擊疾風晦冥武王舉黃鉞瞋目而麾之曰予有天下誰敢害吾于是風去而波

罷遂得濟又云任將之道君入廟門西南而立將入門則趨至堂下北面而立主親操鉞授將軍以柄曰從此上至天者將軍制之

### 綬章

傳云綬大綬也○王制云天子殺則下大綬諸侯殺則下小綬注綬當爲綬有虞氏之旌旗也明堂位云夏后氏之綬注云虞當言綬夏當言旂蓋錯誤也綬謂注旄牛尾于杠首所謂大麾周禮建大麾以田○夏采注云徐州貢夏翟之羽虞以爲綬後世或無染鳥羽象而用之或以旄牛尾爲之綬於幢上所謂注



旄於竿首○說文云綏車中把也○曲禮曰君車已  
駕僕取貳綏跪乘凡僕人之禮必授人綏乘路馬必  
朝服不敢授綏少儀曰執君之乘車則坐僕者右帶  
劒負良綏申之面拖諸臂以散綏升執轡然後步

### 橐

疏云橐者弓衣一名韜故納弓於衣謂之韜弓○左  
傳楚公子圍娶於公孫段氏垂橐而入注云垂橐示  
無弓○樂記云武王克殷倒載干戈包之以虎皮名  
曰建橐注云兵甲之衣曰橐

### 鈴

什天云有鈴曰旂李巡曰以鈴著旒端郭璞曰縣鈴于竿頭畫交龍于旒○左傳云錫鸞和鈴昭其聲也注云鈴在旒

胄

說文云胄兜鍪首鎧也○易曰離爲甲胄○書曰善敕連條乃甲胄○禮記曰獻甲者執胄甲胄則有不可犯之色○周禮輿服雜事曰刺校者校人之執刺兵者也首戴虎皮傳云蒙臯比以犯陳蔡因是有虎皮胄焉蜀隊戴貝胄被犀角此古制也詩云貝胄朱綬謂以貝齒飾胄朱纓綴之也胄插以翟尾垂以紅

言系類考  
大常十有二旂  
四  
紫朱綬之象也

### 旒

箋云旌旒之垂者○巾車云玉路建大常十有二旒  
大行人云上公建常九旒侯伯建常七旒子男建常  
五旒考工記云龍旗九旒以象大火也鳥旟七旒以  
象鶉火也熊旒六旒以象伐也龜蛇四旒以象營室  
也○樂記云龍旒九旒天子之旌所以贈諸侯明堂  
位云魯君孟春乘大路旒十有二旒日月之章祀帝  
于郊○爾雅云纁帛繅素升龍于繅練旒九飾以組  
維以纁注云繅衆旒所著練絳練也用綦組飾旒之

邊用朱縷維連持之不欲令曳地

兵制考卷二十二終

詩經類考

兵制卷二十二